



partii naleraq

Nuuk, 26. marts 2015

Per Rosing-Petersen

UPA2015/32

”Kulturikkut ingerlatsineq sunngiffimmilu sammisaqartitsineq pillugit Inatsisartut peqqussutaata nr. 10-p 21. maj 2002-meersup allannguutissatut siunnersuummik kingusinnerpaamik UPA 2016-mi saqqummiusseqqullugit Naalakkersuisut peqquneqarnissaannik Inatsisartut aalajangiiffisassaattut siunnersuut, taamaaliornikkut kulturimut immikkut inatsimmik aammalu timersornermut immikkut iantsimmik suliaqartoqarsinnaaqqullugu.”

(Inatsisartunut Ilaasortaq Peter Olsen, Inuit Ataqtigiit)

Siullermeerneqarnera

Piorsarsimassuseq - kulturi

INUNNIIPPOQ - Utoqqarniippoq - Meeqqaniippoq - Inersimasuniippoq - Oqaatsiniippoq - Perorsaanermiippoq - Pinnguaruaatsimiippoq - Ileqqulersornermiippoq - Tusagassiorfinniippoq - Attaveqariaatsimiippoq - Paasinnittariaatsimiippoq - Isumaginninnermiippoq - Inulerinnermiippoq - Tarnilerinnermiippoq - Politikkiimiippoq - Peqqissaanermiippoq - Timersornermiippoq - Ilinniartitaanermiippoq - Ilisimatusarnermiippoq - Qaammarsaanermiippoq - Uppernermiippoq - Isummertaasimiippoq - Isiginnittariaasimiippoq - Eqqarsartariaasimiippoq - Inuussutissarsiutiniippoq - Aqutseriaasimiippoq - Pissaanermiippoq...

Taamaattumik siunnersuuteqartoq, Peter Olsen, imatut oqarneratigut, politikikkut suliaqartuusugut tamatta soqutigsaraarput inuiaqtigiit tarnikkut timikkullu nukittuut pilersissagigut, isumaqatiginaannarani pingaaruteqartorujussuuvoq. Kinaassuserpummi sutigut tamatigut nukittorsartuartaavaarput minnerunngitsumillu aamma inatsisitut sinaakkuteqarluartillugu, kalaaliussuserpiaq tunngavigalugu, allammi uagut sinnerluta aaqqinnaviangilaat.

Inatsisartut peqqussutaat nr. 10, 2002-meersuuvoq, tassa ukiut 13 pisoqaassuseqarpoq, suli Namminersornerugallaratta, nutartertariaqarneralu ersarissartariaqarneralu pisariaqaleriartuinnarpoq sualummik avataaniit sunnertikkiartorneq annertusiartortillugu eriagalugu illersorlugu inatsisitigut inissittariaqarami, taamaattumik siunnersuuteqartup tikkuussinera aalajangiinissamullu siunnersuutaa tapersorsorparput soorlu aamma qujanartumik Naalakkersuisut tapersorsoraat.

Taamatuttaa aamma peqatigiiffilerineq aqqutigalugu timersorneq ilisarnaatitsinnut ilaalernikuuvoq ersarissartuinnartoq. Tassanilumi aamma nammineq qangaaniilli timersoriaaserput – inuit pinnguaataat / timersoriaasiat annertusiartortumik inissikkiartornera annertuumik qujassutissaavoq soorlu aamma qaannamik qimussimillu unammersuartarnerit taamaattut.

Kinaassusitta nukittorsuarnissaa pingaaruteqarluinnarmat siunnersuuteqartoq tamakkiisumik isumaqatigaarput, immikkoortullu aappassaaneerneqannginnerani Kultureqarnermut ataatsimiititaliami sukumiisumik suliarineqarnissaa innersuussutigalugu.

Qujanaq.